

दिनांक 24.01.2025
समय: 18.45 बजे
आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी राष्ट्रीय बालिका दिवस ने बालिकावां रा अधिकारां, शिक्षा अर कल्याण माथे ध्यान देबा रो महताऊ मौको बताया-प्रदेशभर मांय बालिका सशक्तिकरण कार्यक्रम व्हीया।
- जयपुर मांय आज सूं दो दिन री युवा संसद सरू व्ही-विधानसभा अध्यक्ष वासुदेव देवनानी मोट्यारां सूं स्वस्थ अर हरित भविष्य खातर जिम्मेदारी सूं कदम बढ़ाबा ने कह्या।
- राष्ट्रीय मतदाता दिवस काल-जयपुर मांय राज्य स्तरीय जळसो राख्यो जावेला।
- प्रदेश मांय केई ठौड़ां माथे दिन रा तापमान मांय 2 सूं 6 डिग्री सेल्सियस ताई री गिरावट दर्ज करी गयी।

000

आज राष्ट्रीय बालिका दिवस मनायो जा रह्यो है। प्रधानमंत्री नरेन्द्र मोदी इण दिन ने बालिकावां ने सशक्त बणाया राखबा अर वां रा अधिकारां, शिक्षा अर कल्याण माथे बत्तो ध्यान देबा रो मौको बताया। यो दिन समाज मांय टाबरियां री कानी ऊं जाग जगाबा रा लगस सूं बणायो जावे है। एक रपट -

राष्ट्रीय बालिका दिवस रे मौके प्रदेशभर मांय व्हा जागरूकता कार्यक्रमां रे जरिये टाबरियां ने मजबूत बणावा री अलख जगाई गई। चूरू मांय राख्या जळसा मांय मेधावी छात्रावां ने सम्मानित कर्यो गयो। वठिने झुन्झुनू मांय इण मौके सिलाई मशीन बाटबां रो कार्यक्रम राख्यो ग्यो। महिला अधिकारिता महकमां रा उपनिदेशक विपलव न्यौला बताया के इण मौके न्यारा न्यारा हलका मांय चोखा काम करबा वाळी बालिकावां ने सम्मानित कर्यो ग्यो।

पाली मांय टाबरियां ने आत्मरक्षा रो प्रशिक्षण दियो गयो वठिने कालिका पेट्रोलिंग टीम वां ने महिलावां सूं जुड़्या कानूनां री जाणकारी दी। राजसमंद रा भीम मांय राजकीय बालिका छात्रावास मांय विधिक साक्षरता शिविर राख्यो ग्यो। वठिने जैसलमेर मांय जागरूकता कार्यशाला राखी गयी अर इण मांय भाग लेबा वाळां ने **बेटी बचाओ-बेटी पढ़ाओ** री शपथ दिलवाई गई। कोटपुतली-बहरोड मांय भी कार्यक्रम राख र कन्या भ्रूण हत्या री रोकथाम रो संदेश दियो गयो। नागौर मांय व्ही कार्यशालावां मांय **बेटी बचाओ-बेटी पढ़ाओ** विषय माथे रंगोली अर पोस्टर बणाया गया। भीलवाडा मांय व्हा कार्यक्रम मांय बालिका शिक्षा अर सशक्तिकरण रो संकल्प लियो गयो।

000

राज्यपाल हरिभाऊ बागडे कह्या के विद्यार्थी विकसित भारत रा संकल्प ने साकार करे। वे कह्या के केवल डिग्री हासिल करबो काफी नी है बल्कि कौशल अर बौद्धिक क्षमता ने भी बढ़ाणो बहुत जरूरी है। श्री बागडे आज वर्धमान महावीर खुला विश्वविद्यालय रा सत्रह वां दीक्षांत जळसा मांय बोल रह्या हा। राज्यपाल कह्या के नुवी शिक्षा नीति देश, समाज अर हर नागरिक खातर महताऊ व्हेला अर आवता टेम मांय इण रा चोखा नतीजा सामे आवेला। इण मौके वर्धमान महावीर खुला विश्वविद्यालय रा कुलपति प्रोफेसर कैलाश सोढानी पढनियां ने टेम री वक्त समझाता थकां आगे बढ़वा अर व्यापार मांय रुचि लेबा माथे जोर दिया।

000

विधानसभा अध्यक्ष वासुदेव देवनानी युवावां सूं स्वस्थ, सुरक्षित अर हरित भविष्य खातर जिम्मेदारी ऊं कदम बढ़ाबा ने कह्या। श्री देवनानी कह्या के म्हा सगळा ने पर्यावरण संरक्षण माथे चर्चा कर इण रो ब्ल्यू प्रिंट तैयार करणो चाहिजे। श्री देवनानी आज विधानसभा मांय राष्ट्रीय पर्यावरण माथे सरू व्ही दो दिन री युवा

संसद रा उद्घाटन सत्र ने सम्बोधित कर रह्या हा। विधानसभा अध्यक्ष कह्या के पर्यावरण संकट केवल एक देश रो मुद्दो नी है बल्कि पूरी मानवता रो साझो दायित्व है, इण हालात मांययुवा शक्ति ने आगे आ र हरित भविष्य खातर काम करणो चाहिजे। वे कह्या के नवाचारां रे सागे म्हाने पाणी, प्रकृति अर प्राकृतिक संसाधनां सूं प्रेम करणो चाहिजे। इण खातर चर्चा रे सागे कारगर कदम उठाणा पडेला।

दो दिन री इण युवा संसद मांय देश रा केई राज्यां रा विश्वविद्यालयां रा पढनियां भाग ले रह्या है।

000

मुख्य निर्वाचन आयुक्त राजीव कुमार बायोमीट्रिक मतदान प्रणाली ने अणूठी बताता थकां कह्या के इण सूं फर्जी मतदान अर एक सू बत्ती टेम मतदान करबा री घटनावां मांय घणी कमी आई है। वे कह्या के या प्रणाली पक्को करे है के केवल सही मतदाता ही वोट कर रह्यो है। श्री कुमार आज नुवी दिल्ली मांय निर्वाचन आयोग री कानी ऊं राख्या सम्मेलन मांय प्रबंधन निकायां ने सम्बोधित कर रह्या हा राष्ट्रीय मतदाता दिवस काल मनायो जावेला। इण मौके जयपुर मांय होबा वाळां राज्य स्तरीय जळसा मांय मतदाता जागरूकता खातर काम करबा वाळां कर्मचारियां ने सम्मानित कर्यो जावेला वठे ही बाड़मेर री जिला कलेक्टर टीना डाबी ने निर्वाचन संबंधी महताऊ कामां खातर सम्मानित कर्यो जावे। राज्यपाल हरिभाऊ बागडे प्रदेशवासियां ने मतदाता दिवस री बधाई अर शुभकामनावां दी। श्री बागडे कह्या के मतदाता दिवस मतदाता जागरूकता रो पर्व है। लोकतंत्र मांय मतदाता ही राष्ट्र रो भाग्य विधाता होवे है। वणा सगळा पात्र मोटयारां सूं मतदाता सूची मांय नाम जुड़बा री अरज करी।

000

प्रधानमंत्री नरेन्द्र मोदी रो आज गणतंत्र दिवस रा जळसा मांय शामिल होबा वाळां एनसीसी कैडेट, स्वयंसेवियां, कलाकार अर जनजातीय समुदाय रा मेहमानां सूं मुलाकात करबा रो कार्यक्रम है। इण खातर प्रधानमंत्री आवास माथे एक समारोह राख्यो गयो है, जिण मांय श्री मोदी कलाकारां अर एनसीसी कैडेट्स रे सागे बातचीत करेला। इण बरस गणतंत्र दिवस रा जळसा मांय सांस्कृतिक विविधता अर सैन्य-शक्ति रो प्रदर्शन कर्यो जावेला। समारोह मांय संविधान री 75वीं वर्षगांठ अर जन-भागीदारी री झांकियां भी दिखायी जावेला। इण बरस न्यारा-न्यारा राज्यां अर केन्द्र सरकार री 31 झांकियां रो खास विषय व्हेला-**स्वर्णिम भारत-विरासत और विकास।**

प्रदेश सूं भी केई हलकां मांय महतव जोग, सेवावां देबा वाळी हस्तियां ने नुवी दिल्ली मांय होबा वाळां गणतंत्र दिवस समारोह खातर न्योतो दियो गयो है। बाड़मेर जिला री गडरारोड़ पंचायत समिति री तामलोर ग्राम पंचायत रा सरपंच हिन्दू सिंह भी कर्तव्य पथ माथे होबा वाळां राष्ट्रीय समारोह रो न्योतो ले र घणा खुश है। इण माथे वे आप रा अनुभव साझा कर्या है-

हनुमानगढ़ जिला री टिब्बी तहसील री आशा कार्यकर्ता शकुंतला तिवाड़ी भी गणतंत्र दिवस जळसा रो न्योतो ले र घणी खुश है। वां ने गांव रा सगळा लोगां सूं बधाईयां मिल री है।

प्रदेश मांय भी गणतंत्र दिवस समारोह री तैयारियां ने आखिरी रूप दियो जा रह्यो है। इण बगत राज्य स्तरीय जळसो उदयपुर मांय राख्यो जा रह्यो है। वठिने जिला मुख्यालयां माथे जिला स्तरीय समारोह राख्यां जावेला, जठे प्रभारी मंत्री अर जिला कलेक्टर ध्वाजारोहण कर मार्च पास्ट री सलामी लेवेला। इण मौके न्यारा-न्यारा सांस्कृतिक कार्यक्रमां रे सागे महतव जोग सेवावां खातर प्रतिभावां ने सम्मान दियो जावेला।

000

आकाशवाणी अर दूरदर्शन 26 जनवरी ने कर्तव्य पथ सूं 76 वां गणतंत्र दिवस परेड रो सजीव प्रसारण करेला। इण रो प्रसारण आकाशवाणी अर दूरदर्शन रा पूरा नेटवर्क रे सागे ओटीटी प्लेटफॉर्म वेब्स माथे भी

कर्यो जावेला। कर्तव्य पथ माथे तैयारियां री समीक्षा करबा खातर सूचना अर प्रसारण सचिव संजय जाजू आज लाइव कवरेज वास्ते आकाशवाणी अर दूरदर्शन कानी ऊं करी गयी तैयारियां रो जायजो कर्या, वे कह्या के गणतंत्र दिवस परेड रो सुचारू प्रसारण पक्को करबा खातर कैमरा अर ऑप्टिकल फाइबर लाइनें बिछाई गई है। प्रसार भारती रा सी.ई.ओ. गौरव द्विवेदी कह्या के परेड रो प्रसारण ओटीटी प्लेटफॉर्म वेब्स माथे कर्यो जावेला।

000

प्रदेश रा केई शहरा मांय व्ही बारिश रे पाछे बत्ता तापमान मांय गिरावट आयी है। धौलपुर मांय तापमान 6 डिग्री सेल्सियस तांई कम व्ह्यो है। मौसम महकमां रे मुजब करौली, बारां, धौलपुर, उदयपुर, चित्तौडगढ़ अर भीलवाड़ा मांय पारो गिर्यो, वठिने दौसा, अलवर, सीकर अर झुन्झुनू मांय ठण्डी हवा चालबा सूं ठिटुरन बणी व्ही है।

महकमो आवता चार दिन तांई मौसम रे सूखो रहबा अर केई ठौड़ां माथे ठण्डी हवा चालबा रो अंदाजो जतायो है। साथै ही तापमान मांय 2 सूं 3 डिग्री सेल्सियस तांई री गिरावट होबा रा आसार है।

000